

## Isa kirjutab talu Kaadsi nimele

Kaadsi-õks-kõist, velekeist,  
paha-korgõt kosilaist -  
5245 umma paino õks tä esse pallõmma,  
heit´ hellile sõnolõ:  
“Inne tohi-i õks ma minnä<sup>q</sup> Taadsi poolõ,  
mõtlõ-i minnä<sup>q</sup> mõrsja poolõ,  
5250 inne mullõ õks joht saa-i tuud näiot,  
tulõ-i mullõ Tuula tütar, -  
ese taha-i õks säääl sukuge anda<sup>q</sup>,  
kasvataja kallutõlla<sup>q</sup>,  
ese taht õks säääl Alelõ anda<sup>q</sup>,  
5255 taht kossi<sup>q</sup> umma kodo -  
ese, annat õks kui mullõ uma jao,  
tiide kirä kimmähe!  
Sis saada õks ma külge kümne<sup>q</sup> kos´a<sup>q</sup>,  
säitme<sup>q</sup> viina<sup>q</sup> sääl taadõ,  
5260 sis õks ka saasõ mi võit,  
mi võit, armas au!”  
Oo õks tuud Kaadsi kavalat,  
tuud veljä vigurist -  
oll´ õks tuul Kaadsi lipõ kiil,  
lipõ kiil, makõ miil,  
5265 joudsõ õks tä pettä<sup>q</sup> uma ese,  
uma maama man´ahuda<sup>q</sup>!  
Esele lubas´ õks tä anda<sup>q</sup> armuleibä,  
vaivalda vatska süvvä<sup>q</sup>,  
imme õks jal lubas´ sängõ süütä<sup>q</sup>,  
5270 sohva pääle suhkort anda<sup>q</sup>.  
Ese kitt´ õks sis perrä Kaadsi lõ,  
ime kullõl´ kull´a poiga.  
Kaadsi pand´ õks sis ette hobõsõ,  
verevä vehmrehe,  
5275 Kaadsi kand´ õks sis esse kangla all,  
astõ vällä armumeelel.  
Kallel lätsi<sup>q</sup> õks nää<sup>q</sup> meelel kantorahe,  
lätsi<sup>q</sup> naardõh notaruistõ,  
säääl teivä<sup>q</sup> õks nää<sup>q</sup> kirä<sup>q</sup> kimmähe,  
5280 teivä<sup>q</sup> paprõ parebehe.  
Sis sai õks jo Kaadsi peremehest,  
kulla krundiesändäst.  
Kaadsi läts õks jo kodo naardõh,  
kaldo kodo karõldõh.  
5285 Kõik õks sis tsirgu<sup>q</sup> tsirisivä<sup>q</sup>,  
kõik lõivo<sup>q</sup> lõõritiva<sup>q</sup>:  
“Ooda<sup>q</sup> õks sa, ooda<sup>q</sup>, esekene,  
haarat vaja, vana miis -  
sul sais õks jo toorba\* tulba otsah,  
5290 salkun\* saiba küleh!  
Mille annit õks sa käest õigusõ,  
kulla krundi säädüse?”  
Õga usu-s õks ese tsirgu kiilt,  
tsirgu kiilt, lõivo miilt.  
5295 Kulli<sup>q</sup> õks jal lauli<sup>q</sup> korgõh,  
kaarna<sup>q</sup> kruuksõ<sup>q</sup> kottal:

“Ooda<sup>q</sup> õks jal, ooda<sup>q</sup>, esekene,  
anna<sup>q</sup> aigo veid´okõsõ -  
küll õks taa koolõs su kodo,  
5300 astus vesi asõmõllõ:  
kodo veevä<sup>q</sup> õks sul tõõsõ<sup>q</sup> krundimehe<sup>q</sup>,  
tarõ hirre<sup>q</sup> hel´otasõ<sup>q</sup>!”  
Sis nakas´ õks jo ese mõtlõmma,  
kallis tätä kahitsõmma.  
5305 Kaadsi õks sis ütäl´: “Kaegu-i taadõ,  
kullõlgu-i kulli jutta!  
Kull õks taa and kurja miilt,  
kaarna süäme-kadsokõist,  
kulli naka-i õks mi jutta kullõmma,  
5310 kaarna sõnno kahitsõmma.”  
Kaadsi läts õks sis kodo hüäl meelel,  
ese majja ilotõh.  
Kotoh läpe-s õks tä olla<sup>q</sup> pall´o aigo,  
mitond tunne tuumatõlla -  
5315 uhkõ läts õks kõõ poiss pruudi poolõ,  
kavval Kaadsi kallumahe.  
Kagoh oll´ õks jo torrõ Toomõ poig,  
Kaadsi otsane uhkõ!  
Taadsi läts õks sis kodo tä targastõ,  
5320 otsane uhkõhõ.  
Kaadsi võtt´ õks sis puust nuu<sup>q</sup> paprõ<sup>q</sup>,  
lask´ kirä<sup>q</sup> lavva pääle.  
Taadsi kuts´ õks sis esse lugõmahe,  
maamat mano kaemahe.  
5325 Ese õks lugi, esi mõtõl´,  
külmäl keelel keerätelli:  
“Kirä<sup>q</sup> võiva<sup>q</sup> ka õks minnä<sup>q</sup> Kiiovahe,  
paprõ<sup>q</sup> minnä<sup>q</sup> pall´o maad!”  
Imel õks sis oll´ hüä miil,  
5330 Taadsi kipõ keelekene.  
Taadsi õks sis Kaadsi lõ ütäl´,  
mõrsja tälle mõistutõlli,  
Taadsi tõi õks sis kirstust uma kirä,  
lask´ paprõ lavva pääle:  
5335 paprõ<sup>q</sup> õks sis käsi<sup>q</sup> paare minnä<sup>q</sup>,  
kirä<sup>q</sup> kokko keerätellä<sup>q</sup> -  
esel oll´ õks kõik Taadsi lõ lubat,  
nimi pant keset kirjä.  
Joogi<sup>q</sup> nakse<sup>q</sup> õks sis juundõ minemähe,  
5340 pardsi<sup>q</sup> paare saamahe.  
Alekonõ õks hot´ sais´ saina takah,  
kai tarrõ kaartõ alt,  
õga tohi-s õks imp Ale tarrõ tulla<sup>q</sup>,  
näile näko imp näüädä.  
5345 Alekonõ õks jo kurvah kodo läts,  
kurval meelel kortiiri.  
Kaadsi lõ lätsi<sup>q</sup> õks jo juundõ kos´ajutu<sup>q</sup>,  
sõidi<sup>q</sup> sõpro sõnomõ<sup>q</sup>.  
Sis õks nää<sup>q</sup> seivä<sup>q</sup>, sis jeivä<sup>q</sup>,  
5350 mar´a-hõste magasiva<sup>q</sup>.